

Das Erst Capittel.

Wie mann diß Instrument oder Triangel von
Wösching / Kupffer oder Holz zurichten
vnd machen soll.

Wiewol ich in dem vor außgangnen Büchli einen bericht
geben han / wie mann diß Instrument oder Triangel zu-
richten vnd machen soll: so aber dasselbige einem nit zu-
kommen möchte syn / so han ich auff dem Tittel dises Büchlin
das Instrument mit synen zalen vnd Buchstaben volkomlichen
vffgerissen vnd verzeichnet: daß der kunstliebend Läser ein söllich
Instrument oder Triangel wirt wol daruß machen vnd verstahn
können. Mann kan auch ein söllich Instrument wol von
gutem herten Holz machen / als wenn es von Wösching gemacht
wurde. Je lenger die Reglen vnd volkomner das Instrument
gemacht wirt / je gewüsser vnd eigentlicher man müssen kan. Ich
han in dem vorigen Büchli das Instrument mit einer halbrun-
den Schyben gemacht / so mit dem Buchstaben E. verzeichnet ist:
In disem aber hab ich dasselbig einem Triangel oder Winckelha-
cken glych gemacht / so auch mit dem Buchstaben E. verzeichnet
ist / ist daran nütze gelegen bringt keinen hindernuß. Beschicht
vß deren vrsachen / wenn einer das Instrument wolte von Holz
oder sonst zimlich groß von Holz oder Kupffer machen / ist es vil
komlicher / von wägen das mann es geschmeidig kan zu sammen
legen. Doch mag es ein jeder nach seinem gefallen machen.

Wüst Günstiger vnd Kunstliebender Läser / hie werdend
vermeldet in dem schryben / kleine vnd grosse Buchstaben: die klei-
nen sind vff dem Instrument vnd vff den Reglen vnd Steckern
verzeichnet: vnd die grossen werden brucht / daß mann die Stend
vnd das ort mit merck / wo einer hin müssen wil / wie in den Fi-
guren verzeichnet sind.